

18/08/1998

Isteri PM rasmikan dewan konsert

KUALA LUMPUR, Isnin - Dewan klasikal pertama di Malaysia, Dewan Filharmonik Petronas di Menara Berkembar Petronas, di sini dirasmikan oleh isteri Perdana Menteri, Datin Seri Dr Siti Hasmah Mohd Ali malam ini.

Perasmian dewan konsert bertaraf dunia itu dilakukan serentak dengan pelancaran Orkestra Filharmonik Malaysia (MPO), yang bakal menjadi perintis genre persembahan muzik klasikal tempatan bertaraf antarabangsa.

Turut hadir pada majlis itu, Perdana Menteri, Datuk Seri Dr Mahathir Mohamad, anggota Kabinet dan Pengerusi Petronas, Tan Sri Azizan Zainul Abidin.

Dr Siti Hasmah yang juga Penaung MPO dalam ucapannya berkata, pembukaan rasmi Dewan Filharmonik Petronas menandakan satu lagi impian negara menjadi kenyataan.

"Perasmian dewan itu ialah hasil usaha yang ditunggu-tunggu oleh rakyat Malaysia selama ini ke arah memperkaya dan memperkembangkan seni muzik di negara ini," katanya.

Beliau berkata, perasmian dewan itu dan penubuhan (MPO) membuka peluang kepada rakyat Malaysia dan pencinta muzik untuk menyaksikan secara langsung persembahan muzik klasikal yang terbaik.

"Detik yang ditunggu-tunggu ini, selain usaha oleh orkestra antarabangsa dan persembahan oleh Kumpulan Kesenian Petronas akan membantu Malaysia memainkan peranan dalam dunia muzik dan seni," katanya.

Dr Siti Hasmah, berkata Dewan Filharmonik Petronas menyediakan kemudahan yang dinantikan manakala penubuhan MPO memenuhi keperluan pendidikan dan menikmati muzik.

"MPO akan mengendalikan kelas master, bengkel dan aktiviti muzik yang lain untuk membantu ahli muzik mencapai kecemerlangan.

"Sehubungan itu, adalah menjadi harapan kita inisiatif ini akan membuka jalan bagi penubuhan akademi muzik bagi mempertingkatkan kemahiran kepakaran dan pengetahuan mengenai muzik ke tahap profesional," katanya.

Dr Siti Hasmah dan Dr Mahathir kemudian memukul rebana ubi bagi menandakan pembukaan dewan itu sebelum menyaksikan konsert gala klasikal MPO selama hampir dua jam diketuai Pengarah Muzik, Kees Bakels.

(END)